

Otmar Oduber ta retira temporalmente di parlamento



Pagina 2

- **Ursell Arends na Parlamentario Otmar Oduber: "Bo ta parce Buchi Jendi"**

Pagina 6

- **Parlamentario Gino Goeloe: "Sin cuenta anual, Aruba no tin control financiero"**

Pagina 3

- **Minister Geoffrey Wever: 294 miyon florin na interes den 2025**

Pagina 2

Parlamentario Rocco Tjon (MEP):
"Si Rijkswet HOFA ta asina bon pa Aruba, dicon Gobierno no ta contesta pregunta?"



Pagina 6

Hulanda: Seis aña di prison y tratamiento psiquiatrico recomenda den caso di abuso sexual di mucha



Pagina 9

Presidente di Colombia ta condena administracion di Trump despues di acusa Colombia di falta di cooperacion



Pagina 10

Minister Geoffrey Wever:

294 miyon florin na interes den 2025

Durante 2025 Pais Aruba tin e deber di paga 294 miyon florin na interes riba prestamonan existente. Minister di Finanzas, Geoffrey Wever (Futuro) ta informa cu conforme articulo 11 di LAft e cambio di presupuesto 2025 aproba a wordo manda pa CAft. Banda di paga 294 miyon florin na interes, lo paga tambe un total di 595 miyon florin como “aflossing” riba debenan, local y internacional den 2025.

Segun e ley di supervision, e debe como parti di e producto interno bruto mester ta 50 porciento den 2040. Pa 2025 ta proyecto cu esaki lo yega un nivel di 67 porciento. Pa por cumpli cu e pagonan na interes y riba debenan, e presupuesto ta e instrumento y cu aprobacion di parlamento pa realisa esaki.

E necesidad financiero of “financieringsbehoefte” ta loke Aruba mester fia riba mercado local y of internacional pa paga debe. E surplus di 1%



segun ley y e suma cu mester paga na debe ta determina e necesidad financiero di gobierno. Den e prome cambio di presupuesto 2025 aproba, cu un surplus proyecta di 87.5 miyon florin y un total di 595 miyon florin “aflossing” riba debenan, local y internacional den 2025, gobierno su nece-

sidad financiero ta 508 miyon florin proyecta pa 2025. Di esaki, un suma di 165 miyon a wordo fia riba mercado local caba na principio di e aña aki. Pa Aruba por fia riba mercado internacional, Rijkswet mester aproba e peticion pa Aruba por subi mercado internacional. Den luna di

juli Aruba a ricibi aprobacion pa por fia maximo USD 150 miyon riba mercado internacional.

Como cu Aruba no a logra entrega e concepto di Rijkswet manera palabra cu Hulanda prome cu 1 di mei 2025, Aruba mester paga un interes di 6.9 porciento en bes di 5.1 porciento riba e “Covid-lening” cu ta nifica Afl. 7 miyon extra tur aña.

E cuadro legal di supervision financiero existente no ta duna Aruba e oportunidad pa presta via Hulanda na un interes mas abao. Segun e presupuesto di Hulanda 2026, e interes mas halto cu Corsou y Sint Maarten ta paga ta respectivamente 3.1 y 3.0 porciento. Aruba ta pagando entre otro 6.9 porciento riba e “Covid-lening” y tin cu fia riba mercado local y internacional na un interes determina pa mercado. Pa refinancia debenan existente, mercado local y internacional ta determinante pa e tasa di interes cu Aruba lo haya. Desarayonan geopolitico, guerra y e posibel

impacto di e trade war riba economia Mericano ta factornan cu lo por hisa e interes cu e consecuencia cu e suma cu Aruba mester paga na interes ta bira mas grandi. Esaki ta un riesgo existente cu por afecta e finanzas publico di Aruba. Como isla chikito nos no tin influencia riba esaki.

Ta un realidad cu supervision financiero ta garantiza disciplina presupuestario pero e no ta facilitada pa Aruba por fia na un interes mas abao na Hulanda na e momento aki, manera ta conta pa Corsou y Sint Maarten si. Pero ta un realidad tambe cu si logra haya fia na Hulanda na un interes mas abao y crea mas espacio financiero riba e presupuesto, cu por wordo inverti bek den desaroyo di Aruba y di nos hendenan.

Supervision financiero t’ey y nos mester logra haya mas beneficio pa por financia y implementa nos propio maneho, maneho cu como isla nos mes ta determina, segun minister Geoffrey Wever.

Otmar Oduber ta retira temporalmente di parlamento

Despues di mas cu 5 aña di persecucion, Sr. Otmar Oduber ta anuncia cu e ta distancia su mes di Parlamento temporalmente pa atende cu e caso cu tin contra su persona den corte di apelacion, cual e ta califica como abuso y humiacion.

“Mi a demostra cu no solamente tur e acusacionnan inicial contra mi persona tawata falso, pero tambe mi a logra haya e confianza, apoyo y sosten di e pueblo di Aruba durante e ultimo eleccion un biaha mas. Pa esaki mi ta y lo keda semper humildemente agradecido. Sin embargo, ministerio publico, cu tin otro metanan, no a keda satisfecho cu e ultimo sentencia y a dicidi di apela e caso den corte superior. Mi persona tambe a dicidi di apela, y asina cu tur confiansa lo mi bai prueba mi inocencia completo y demostra cu loke a bin ta tuma lugar durante avor pa ya mas di 6 aña ta simplemente un abuso di poder di parti di ministerio publico y forsanan politico cu nunca lo por a haci e mesun cos aki cu un Minister of ex-Minister na Hulanda. Mi a tuma e decision di bay tur cu tin contra

e abuso y persecucion na un forma contundente y definitivo, respetando e trias politica y dunando respet na e organo mas halto di nos Pais. Pa es motibo aki mi persona a dicidi di tuma mi retiro temporal como miembro di Parlamento pa asina actua y duna contenido na e palabranan ariba menciona,” asina Sr. Oduber a declara.

Den pasado su persona a yega di retira como Minister, siendo e di dos “votegetter” di henter Aruba, pero a haci esaki pa principionan y awe e ta bisa cu no ta diferente. “Mi principio y respet pa e funcion di honor aki, ta exigi pa mi duna mi mes e espacio pa atende cu e caso y asina esaki termina, lo mi asumi e responsabilidad back, representando nos pueblo cu tur honra y fervor. Cu mi posicion y decision tuma, mi ta spera di por contribui na un Parlamento mas respeta, contrario na hechonan di otro nan den pasado.”

Sr. Oduber a declara cu e no lo haci uzo di e derecho pa “Overbruggings toelage” y ademas lo sigui sostene e fraccion di PPA y apoyando e candidato señor Eduard Piet-

ers como e proximo miembro di Parlamento cu den opinion di Sr. Oduber ta bon prepara y ta haciendo un excelente trabao den e fraccion oranje. Señor Pieters lo keda tambe sosteni den fraccion pa otro colega di partido, cu sigur lo ta un apoyo grandi na e tarea importante di e fraccion di PPA.

“Martin Luther King Jr a yega di bisa ‘The time is always right to do what is right’ y e momento husto pa muestra respet na nos organo di Parlamento y e Trias Politica cu ta e pilar di nos democracia, ta awo! Cu esaki mi kier ta e chempel di con ta duna honor na e organo mas halto di nos pais y cu no mester tin ley pa regula loke mester ta “fatsoen”. No mester ley pa por haci loke ta wordo spera di un bon lider,” asina Sr. Oduber a sigui bisa.

Segun Sr. Oduber; e lucha pa restaura respet y dignidad pa cu e organo principal di nos pais ta cuminsa cu e decision y accion aki cu su persona a tuma pero tambe cu e decision di “principio” di su persona pa a bay corte contra un acto cu den su concepto ta anti constitucional y



anto democratico. E decision tuma pa Parlamento ta stroba su persona di eherce su funcion conforme nos constitucion y ta limita e Miembro di Parlamento den su trabao y responsabilidadnan di representa e votador di Partido Patriotico di Aruba y e pueblo di Aruba en general conforme nos “kiesverordening”.

E hecho cu Hues den su sentencia ta confirma e hecho cu e medida tuma pa e mayoria den Parlamento ta “Stroba” e trabao di mi persona pa representa mi pueblo, pero cu respetando e trias politica, ta prefera di laga e 3 organonan mes regula nan mes, NO ta

cambia e conviccion cu cual nos lo sigui vocifera, den number di e mas di 3500 votonan cu a pone PPA bek den Parlamento despues di 20 aña di ausencia, e opinion y interes di e pueblo Arubano.

“Cu Dios mi dilanti, mi famia band’i mi y e pueblo mi tras, nos lo logra husticia y libertad di persecucion for once and for all.

Cu nos bon Dios sigui bendiciona nos pais y nos comunidad den su totalidad,” palabranan di Sr. Otmar Oduber anunciando su decision pa retira temporalmente di Parlamento.